



**KENYATAAN AKHBAR
OLEH KETUA AUDIT NEGARA**

BERKENAAN:

**LAPORAN KETUA AUDIT NEGARA MENGENAI
PENYATA KEWANGAN KERAJAAN NEGERI
DAN PRESTASI KEWANGAN AGENSI NEGERI SELANGOR TAHUN 2018**

**LAPORAN KETUA AUDIT NEGARA MENGENAI AKTIVITI JABATAN/AGENSI
DAN PENGURUSAN SYARIKAT KERAJAAN NEGERI SELANGOR
TAHUN 2018 SIRI 2**

1. Pengauditan Penyata Kewangan Kerajaan Negeri dilaksanakan selaras dengan Seksyen 5(1)(a) Akta Audit 1957 yang menghendaki Ketua Audit Negara mengaudit akaun persekutuan dan negeri. Pengauditan terhadap aktiviti jabatan/agensi pula merupakan pengauditan prestasi yang dilaksanakan di bawah Seksyen 6(d), Akta Audit 1957.
2. Perkara 107(1) Perlembagaan Persekutuan menghendaki Ketua Audit Negara mengemukakan laporannya kepada Yang di-Pertuan Agong yang hendaklah menyebabkan laporan itu dibentangkan di hadapan Dewan Rakyat. Berdasarkan Perkara 107(2) pula, laporan hendaklah dikemukakan kepada Kebawah Duli Yang Maha Mulia Sultan Selangor bagi memperkenan untuk dibentangkan di Dewan Negeri Selangor.
3. LKAN mengenai Penyata Kewangan Kerajaan Negeri dan Prestasi Kewangan Agensi Negeri Selangor Tahun 2018 telah dibentangkan di Dewan Rakyat pada 4 November 2019. Manakala LKAN mengenai Aktiviti Jabatan/Agensi dan Pengurusan Syarikat Kerajaan Negeri Selangor Tahun 2018 Siri 2 pula telah dibentangkan di Dewan Rakyat pada 2 Disember 2019. Seterusnya, kedua-dua laporan ini akan dibentangkan pula di Dewan Negeri Selangor pada 17 Mac 2020.
4. Laporan Ketua Audit Negara pada kali ini antara lainnya mengandungi perkara-perkara penting seperti berikut:

4.1. Laporan Ketua Audit Negara Mengenai Penyata Kewangan Kerajaan Negeri dan Prestasi Kewangan Agensi Negeri Selangor Tahun 2018

(a) Pengesahan Penyata Kewangan Kerajaan Negeri

Pengauditan yang dijalankan mendapati Penyata Kewangan Kerajaan Negeri Selangor Bagi Tahun Berakhir 31 Disember 2018 telah diberi Pendapat Tanpa Teguran. Penyata kewangan tersebut menunjukkan gambaran yang benar dan saksama tentang kedudukan kewangan Kerajaan Negeri Selangor dan rekod perakaunan telah diselenggarakan dengan lengkap dan kemas kini.

(b) Analisis Kewangan Kerajaan Negeri

- i. Secara keseluruhannya, baki Kumpulan Wang Disatukan pada akhir tahun 2018 bagi Negeri Selangor telah menurun sejumlah RM703.44 juta atau 24.8% menjadi RM2.135 bilion pada tahun 2018 berbanding RM2.838 bilion pada tahun 2017.
- ii. Kerajaan Negeri mencatat defisit di Akaun Hasil Disatukan sejumlah RM619.27 juta pada tahun 2018 berbanding defisit berjumlah RM368.56 juta pada tahun 2017. Defisit ini disebabkan kesan daripada penurunan hasil sejumlah RM811.58 juta melebihi penurunan perbelanjaan sejumlah RM560.87 juta.
- iii. Pada tahun 2018, Hutang Awam telah mencatatkan penurunan sejumlah RM17.54 juta (1.6%) kepada RM1.103 bilion berbanding RM1.121 bilion pada tahun 2017. Penurunan ini disebabkan jumlah terimaan wang pinjaman daripada Kerajaan Persekutuan berjumlah RM17.68 juta pada tahun 2018 untuk membiayai projek bekalan air telah berkurangan sejumlah RM34.40 juta berbanding tahun 2017. Di samping itu, bayaran balik hutang juga telah dibuat pada tahun 2018 berjumlah RM11.95 juta.

(c) Penyerahan, Pengesahan, Pembentangan Penyata Kewangan dan Prestasi Kewangan Agensi Negeri

- i. Mengikut Seksyen 5(1)(c), Akta Audit 1957, Ketua Audit Negara mempunyai kuasa untuk mengaudit penyata kewangan agensi negeri iaitu Badan Berkanun Negeri (BBN), Pihak Berkuasa Tempatan (PBT) dan Majlis Agama Islam (MAI). Objektif pengauditan adalah untuk memberikan pendapat terhadap penyata kewangan agensi negeri sama ada penyata ini menggambarkan

kedudukan yang benar dan saksama serta rekod perakaunan yang berkaitan telah diselenggarakan dengan teratur dan kemas kini.

- ii. Setakat 30 September 2019, bilangan penyata kewangan yang perlu diaudit dan telah disahkan adalah seperti berikut:

BIL.	PENYATA KEWANGAN	BILANGAN PENYATA KEWANGAN TAHUN 2018	PENSIJILAN SETAKAT 30.09.2019
1.	Badan Berkanun Negeri	13	11
2.	Pihak Berkuasa Tempatan	12	7
3.	Majlis Agama Islam Negeri	1	1
JUMLAH		26	19

- iii. Berdasarkan 26 Penyata Kewangan Agensi Kerajaan Negeri Tahun 2018, sebanyak 19 telah selesai diaudit dan diberikan pensijilan. Daripada 19 penyata kewangan tersebut, sebanyak 14 telah diberikan Pendapat Tanpa Teguran, satu (1) telah diberikan Pendapat Tanpa Teguran dengan *Emphasis of Matter* dan empat telah diberikan Pendapat Berteguran. Manakala sebanyak tujuh (7) penyata kewangan lagi masih belum dimuktamadkan.

4.2. LKAN mengenai Aktiviti Jabatan/Agensi dan Pengurusan Syarikat Kerajaan Negeri Selangor Tahun 2018 Siri 2

(a) Pengurusan Aktiviti Jabatan/Agensi Negeri

- i. Pengauditan prestasi telah dijalankan mengikut standard pengauditan antarabangsa iaitu *The International Standards of Supreme Audit Institutions* (ISSAI) 3000, 3100 dan 3200. Pengauditan prestasi yang dijalankan bertujuan menilai sama ada aktiviti/projek Kerajaan telah dilaksanakan dengan cekap dan berkesan serta sejauh mana objektif aktiviti/projek ini telah tercapai. Ia juga bertujuan untuk menilai sejauh mana wang awam telah dibelanjakan dengan berhemat tanpa berlaku pemborosan dan pembaziran serta mendapat *best value for money*.
- ii. Bagi LKAN Tahun 2018 Siri 2 ini, sebanyak dua (2) pengauditan prestasi yang berkaitan dengan pengurusan program/aktiviti telah dilaksanakan di peringkat negeri Selangor. Secara keseluruhan, pengauditan yang dijalankan telah menunjukkan penambahbaikan

dalam pelaksanaan aktiviti jabatan negeri seperti penetapan asas-asas yang jelas dalam pelaksanaan projek atau program. Bagaimanapun, sasaran/objektif aktiviti yang ditetapkan belum dapat dicapai sepenuhnya, selain terdapat beberapa isu ketidakcekapan dalam pengurusan aktiviti.

(b) Pengurusan Syarikat Kerajaan Negeri

- i. Pengauditan bagi pengurusan syarikat kerajaan dijalankan selaras dengan Seksyen 5(1)(d), Akta Audit 1957. Pengauditan merangkumi tiga (3) aspek iaitu tadbir urus korporat, pengurusan aktiviti dan kedudukan kewangan syarikat.
- ii. Bagi Laporan Ketua Audit Negara Tahun 2018 Siri 2 ini, satu (1) pengauditan pengurusan syarikat kerajaan telah dilaksanakan di negeri Selangor iaitu SACC Convec Sdn. Bhd..

- (c) Semua pegawai pengawal/ketua jabatan yang berkenaan telah dimaklumkan terlebih dahulu mengenai perkara yang dilaporkan dalam Laporan Ketua Audit Negara untuk tujuan pengesahan. *Exit Conference* juga telah diadakan bagi tujuan membincangkan penemuan Audit dan mendapatkan penjelasan serta maklum balas terhadap isu-isu berbangkit. Bagi membolehkan tindakan pembetulan dan penambahbaikan diambil oleh ketua jabatan berkenaan, Jabatan Audit Negara juga telah mengemukakan 15 syor terhadap pengurusan aktiviti Jabatan/Agensi dan Pengurusan Syarikat Kerajaan Negeri untuk memperbaiki kelemahan yang dilaporkan.

5. LKAN Mengenai Penyata Kewangan Kerajaan Negeri dan Prestasi Kewangan Agensi Negeri Selangor Tahun 2018 serta LKAN Mengenai Aktiviti Jabatan/Agensi dan Pengurusan Syarikat Kerajaan Negeri Selangor Tahun 2018 Siri 2 dijadual dibentangkan di hadapan Dewan Negeri Selangor pada 17 Mac 2020. Oleh itu, LKAN ini akan dimuat naik di laman web Jabatan Audit Negara pada tarikh yang sama. Orang awam boleh melayarinya di alamat <http://www.audit.gov.my> mulai 17 Mac 2020 selepas jam 10.00 pagi. Sebarang pertanyaan lanjut/pandangan mengenai Laporan tersebut bolehlah dialamatkan kepada [Warkah Untuk Ketua Audit Negara](#).

Ketua Audit Negara
Malaysia

17 Mac 2020